

ಎಫೆಸದವರಿಗೆ ಬರೆದ ಪತ್ರಿಕೆ ಪೌಲನೆ ಎಫೆಸವಾಳನ ಲೀಖ್ಯೋತೆ ಚಿಟ್ಟಿ ಮಾಲುಮ್ ಕರಾನು

ಎಫೆಸವಾಳನ ಲೀಖ್ಯೋತೆ ಚಿಟ್ಟಿ ಕ್ರಿಸ್ತನ ಪೈದಾಖ್ತನ ವಾರ್ ಘಣೇಥಿ ತೀನಿಖ್ತ್ ವರಖ್ತಿನಿ ಉಂಬರ್ಮ ಲಿಖ್ತಿರ್ಲ್ಲ್ಯಾ. ಕೊಲೊಸ್ಸೆವಾಳಾನ ಲೀಖಾಯತೆ ಚಿಟ್ಟಿಬಿ ಆ ವೇಳ್ತಲೀಖ್ತಿರುಸ್. ಲೀಖಾಪಟ್ ಕರಾವಾಳೊ ಮೆ ಅಪೊಸ್ತಲ ಪೌಲಕರಿ ಪರಿಚಯ್ ಕರಸ್ 1:1 ಕೊಲೊಸ್ಸೆನು ಚಿಟ್ಟೇಮ ರ್ಡ್ಡಿಯಿತೆ ತಿಮ್ ಶೊಂತ್ ಖ್ತಲಾಮ್ ಎಫೆಸಮ ಲೀಖ್ಯೋತೆ ಚಿಟ್ಟೇಮ ದೆಖಾಯನಾತೋಬಿ ಘಣೇಥಿ ಲೀಖಾಪಟ್ ಕರವಾಳು ಪೌಲನೆ ಲೀಖಿರಾಖ್ಯೊಸ್ ಕರಿ ಮಾನಿಲೇಸ್. ಆ ಕಾರಣ್ಥಿ ಆ ಚಿಟ್ಟಿ ಯೊ ತಬರ್ಖಾಮ ಕೈಯೇಕ್ ಸಬೆನ ಪೈಲಾಯು ಉಷೆ. ಪೌಲನೆ ಆ ಚಿಟ್ಟಿ ಲಿಖಾನಿವಖ್ತೆ ಇನೆ ಖ್ತಾರ್ಕೊಟ್ ಮ ಟ್ಲೂ ಕರಿ ಪೌಲ ಬೋಲಸ್ 3:1, 4:1, 6:20 ಪೌಲನೆ ಆ ಚಿಟ್ಟಿ ಎಫೆಸನಿ ಸಬೆನ ತುಕಿಕನ ಭೇಟಿ ಕರಾನಿ ವೇಳ್ತ ತುಕಿಕನ ಹಾತ್ಮ ದಿಮೋಕ್ ಲ್ಯೊ 6:21-22 ಎಫೆಸ ಖ್ತಯೇರ್ ಏಕ್ ಮೋಟು ಖ್ತಯೇರ್ ಹುಯು ಯೋ ರೋಮ್ ಸಾಮ್ರಾಜ್ಯನು ಏಷ್ಯಾನ ಮೈಹಿನ ತಬರ್ಖಾನು ರಾಜಧಾನಿ ಹುಯಿರೂಥು ಎಫೆಸ ಖ್ತಯೇರ್ ಗ್ರೀಕ್ ದೇವ್ಥಿ ಹುಯಿರ್ದ್ಧೀತೆ ಆರ್ತೆಮೀಸ್‌ನು ದೇವಸ್ಥಾನ್ಥಿ ಎಫೆಸ ಪ್ರಸಿದ್ ಹುಯಿರ್ದ್ಧು. ಅಪೊ 19:23-31 ಎಫೆಸನಿ ಸಬೆ ಶುರುವಾತ್ ಹುಯತದೆ ಯೊ ಘಟ್‌ರ್ದೀನ್, ಕತೋಬಿ ಇನಪಾರ್ ಯೊ ಭಂದೈನ್ ಖ್ತರ್ತಿಹುವಾನಿ ಟೆಪ್ಪೊಹುಯಿರುಥು ಪ್ರಕಾಶಿತ್ 2:1-7 ಪೌಲನಿ ಲೀಖಾವನಿ ಆಧಿ ಚಿಟ್ಟಿಮಾಸ್ ದೇವ್ತೆ ಇನ ಅದ್ಮಿವೋನ ಕಿಮ್ ಚೂಣಿಲಿದೊ ಅಜ್ಜು ಯೇಸು ಕ್ರಿಸ್ತಧಿ ಇಬ್ಬಿ ಪಾಪ್‌ಧಿ ಇನೆ ಕಿಮ್ ಛೋಡಾಯೊ ಕರಿ ಬಾರೇಮ ಬೋಲಸ್. ಯೊ ಸಬೆ ಕ್ರಿಸ್ತನು ಶರೀರ್ ಅಜ್ಜು ಕ್ರಿಸ್ತ ಇನು ಮುಡ್‌ಕ್ಯು ಹುಯಿರೊಸ್, ಅಜ್ಜು ಕ್ರಿಸ್ತ ಘರ್‌ನೊ ಮುಖ್ಯ ಕೋಣಾನೊ ಬಂಡೊ ಕರಿ

ಬೋಲಾನು ಪರಕ್ಥಿ ಬೋಲಸ್. ಆ ಚಿಟ್ಟಿನ ಬಿಜ್ ಆಧಾಭಾಗ್ ಪೌಲನೆ ಕ್ರಿಸ್ತನಿ ಜಿವ್ವಾಮ ಅಪ್ಪೆ ಕಿಮ್ ಜಿವ್ವು ಕರ್ನುಕರಿ ಖ್ವಾಜ್ ದೇಸ್.

ಕಾಡಿದೇಖೊ

1. ಪೌಲನೆ ಇನಿ ಪರಿಚಯ್ ಕರ್ತೊಹುಯಿನ್ ಎಫೆಸವಾಳನ ಖ್ವಲಾಮ್ ಕರಸ್. 1:1-2
2. ಇನಕೇಡೆಥು ಯೋ ಕ್ರಿಸ್ತಮ ಸಬೆಅಖ್ವಾನಿ ಸಂಭಂದಾನಿ ಬಾರೇಮ ಬೋಲಾಸ್. 1:3—3:21
3. ಇನ ಕೇಡೆಥು ಪೌಲನೆ ವಿಶ್ವಾಸಿ ಖ್ವಾರು ಕಿಮ್ ಜಿವ್ವು ಕರ್ನ್ ಕರಿ ಬಾರೇಮ ಲಿಖಸ್. 4:1—6:20
4. ಖ್ವರ್ತಿಮ ಪೌಲ ಥೋಡಿ ಕಡ್ಶೀನು ಖ್ವಾಜ್ ದೇಸ್. 6:21-24

1 ದೇವ್ನಿ ಗಳ್ಜೋಡ್ಡ ಕ್ರಿಸ್ತ ಯೇಸುಮ ಅಪೊಸ್ತಲ ಹುಯಿರ್ದೊಸ್ತೆ ಪೌಲ, ಎಫೆಸಮ ಛೇತೆ ದೇವ್ನ ಅದ್ಮಿನಾಬಿ, ವಿಶ್ವಾಸ್‌ವಾಳನಾಬಿ ಲಿಖಾನು ಶಾತ್‌ಕತೊ,

2 ಅಪ್ಪೊ ಬಾ ಹುಯಿರ್ದೊಸ್ತೆ ದೇವ್‌ಥಿಬಿ ಪ್ರಭು ಹುಯಿರ್ದೊಸ್ತೆ ಯೇಸು ಕ್ರಿಸ್ತಧಿಬಿ ತುಮುನ ವಾರ್‌ಖೊಬಿ ಶಾಂತಿಬಿ ಮಳಾದೆ.

ಕ್ರಿಸ್ತಮ ಛಾತೆ ಆತ್ಮೀಕ್ ಆಶೀರ್ವಾದ್‌ಖ್ವಾರು

3 ಅಪ್ಪೊ ಪ್ರಭು ಯೇಸು ಕ್ರಿಸ್ತನೊ ದೇವ್‌ಬಿ ಅಜ್ಜು ಬಾ ಹುಯಿರ್ದೊಸ್ತೆ ಇನ ಧನ್ಯವಾದ್ ಹುವಾದೆ, ಕ್ರಿಸ್ತನಿ ಗಳ್ಜೋಡ್ಡ ಇನೆ ಪರಲೋಕ್‌ಮ ಛಾತೆ ಹರೇಕ್ ಆತ್ಮೀಕ್ ಆಶೀರ್ವಾದ್‌ಖ್ವಾರು ಅಪ್ಪುನ ದಿರಾಖ್ಯಾಸ್.

4 ಜಗತ್ ಉಬ್‌ಜಾತಿ ಪಹಿಲೇಸ್ ಅಪ್ಪೆ ಇನಖ್ವಾಪ್ಪೆ ಪರಿಶುದ್ಧಬಿ ದೋಷ್‌ಕೊಂತೇಬಿ ಹುಯಿರ್ದೊಣು ಕರಿ ದೇವ್ನ ಕ್ರಿಸ್ತನಿ ಗಳ್ಜೋಡ್ಡ ಅಪ್ಪುನ ಚೂಣಿಲಿದೊ. ಶನಕತೊ ಆ ಇನಿ ಪ್ಯಾರ್ ಹುಯಿರ್ದೊಸ್.

5 ದೇವ್ ಪೈಲೆಥೊಸ್ ಯೇಸು ಕ್ರಿಸ್ತಧಿಬಿ ಅಪ್ಪುನ ಇನ ಲಡ್ಡಕರಿ ಬಣೈನ್ ಸ್ವೀಕಾರ್ ಕರಾನಖ್ವಾಜೆ ಚೂಣಿಲಿದೊ. ಯೊ ಇನಿ ಖ್ವಾಜ್ ಹುಯಿರ್ದೊ ಇನಿ ಖ್ವಯಾಲೊಬಿ ಹುಯಿರ್ದೊ.

6 ಅಜ್ಜು ಅಪ್ಪೆ ದೇವ್ನಿ ಮಹಿಮೆನಿ ವಾರ್ಖಾನ್‌ಖಾಜೆ ಧನ್ಯವಾದ್ ಕರಿಯೆ. ಶನಕತೊ ಯೋ ಇನೊ ಪ್ಯಾರ್‌ಯ್ನಿ ಛಿಯ್ಯಾನ್‌ಖಾಜೆ ಅಪ್ಪುನ ಪುಗಟ್ ವರದಾನ್ ದಿರಾಖ್ಯೊಸ್.

7 ಯೇಸು ಕ್ರಿಸ್ತನೆ ಅಪ್ಪುಖಾಜೆ ರಂಚ್ಯೊತೆ ಲ್ಹೊಯಿಥೀಸ್ ಛುಟ್ಕಾರ್‌ಹುಯು, ಕತೊ ದೇವ್ನಿ ಮಹಾ ವಾರ್‌ಖ್ವೇಥೀಸ್ ಅಪ್ಪು ಪಾಪ್‌ಖಾರ್ಡು ಮಾಪಿ ಹುಯಿಗು.

8 ದೇವ್ನಿ ಇನಿ ಹರೇಕ್ ಗ್ಯಾನ್ ಅಜ್ಜು ಅಕ್ಕಲ್‌ಥಿ ಅಪ್ಪುನ ಯೊ ವಾರ್‌ಖಾನ್ ಚೆಹೆಳ್‌ಥಿ ದಿರಾಖ್ಯೊಸ್.

9 ದೇವ್ ಇನಿ ಖ್ವಾಜ್ ಕರೊತೆ ಇನ ಕರೊತೆ ಅಜ್ಜು ಕ್ರಿಸ್ತನ ಖ್ವಾಜೇಥಿ ತದೇಸ್ ಪೂರಹುವನ ಖ್ವಾಜೆ ತೀರ್ಮಾನ್ ಕರಿರಾಖ್ಯೊತೆ ಇನಿ ಗಪ್ಲತನಿ ಖ್ವಾಜ್‌ನ ಅಪ್ಪುನ ಮಾಲುಮ್ ಕರಾಯೊ.

10 ಆ ಖ್ವಾಜ್‌ನ ಬರೊಬರ್ರಿ ವಖ್ವತ್‌ಮ ಪೂರಕರಸ್. ಖ್ವಾರಿ ಉಬ್‌ಜಾಪ್ಪಿ ಧರ್ತಿಬಿ ಪರಲೋಕ್‌ಮ ಕ್ರಿಸ್ತನ ಮುಡ್‌ಕ್ಯು ಕರಿ ಬಣೈನ್ ಎಕ್ಕು ಕರ್ಶೆ.

11 ಖ್ವಾರು ಕಾಮ್ ದೇವ್ನಿ ಮನ್ನಿ ತರಿಖಾಥಿ ಬಣೈಗಯು ಅಜ್ಜು ದೇವ್ ಅಪ್ಪುನ ಇನಿ ಶೊಂತ್ ಖ್ವಾಜ್‌ನಿಂತರ ಪಹಿಲೇಸ್ ನೇಮಕ್‌ಹುಯಿರ್ದಾತೆ ಅಪ್ಪುನ ಕ್ರಿಸ್ತನಿ ಘಳ್‌ಜೋಡ್ತ ಇನ ಆದ್ನಿ ಹುವಾನಖಾಜೆ ಚೂಣಿಲಿದೊ.

12 ಅಮ್‌ರ್ದವಾಪರ್ ಕ್ರಿಸ್ತನಖಾಜೆ ಪಹಿಲೆ ವಿಶ್ವಾಸ್‌ನ ಹುಯಿರ್ದಾತೆ ಅಪ್ಪೆ ಇನಿ ಮಹಿಮೆಮ ಧನ್ಯವಾದ್ ಕರಾವಾಳ ಹುಯಿರ್ದೆವ್ವು ಕರಿ ಅಮ್ ಕರೊಯ್!

13 ಸುವಾರ್ತೆನಿ ಖ್ವಾಜಿ ಸಂದೇಶ್ ಖ್ವಮ್‌ಜಾನಿ ವಖ್ವಾತೆ, ತುಮೇಬಿ ಜಿನು ದೇವ್ನಿ ಅದ್ನಿ ಹುಯಿರ್ದಾಥ. ಸುವಾರ್ತೆ ತುಮುನ ಛುಟ್ಕಾರ್ ದಿದು. ತುಮೆ ಕ್ರಿಸ್ತಮ ವಿಶ್ವಾಸ್ ಕರಿರಾಖ್ಯಾಸ್ ಅಜ್ಜು ದೇವ್ ಯೋ ವಾಗ್ದಾನ್ ಕರೊತೆ ಪವಿತ್ರಾತ್ಮನ ತುಮುನ ದ್ಯಾವಥಿ ಇನೊ ಮುದ್ರೊನಾಖಿನ್ ಖ್ವಣೇದ್ ಕರಿರಾಖ್ಯೊಸ್.

14 ದೇವ್ನಿ ಇನ ಶೊಂತ್ ಅದ್ನಿನ ಛುಟ್ಕಾರ್ ಉಷೆಕರಿ ಬೋಲಾನ

ಪವಿತ್ರಾತ್ಮನ್ ಅಪ್ಪುನ ಖುಂಞ್‌ಕಾರ್ ಹುಯಿರ್ದೊಸ್, ಅನಖ್ವಾಜೆ ದೇವ್ ಮಹಿಮೆ ಕರಿಯೆ.

ಪೌಲನಿ ಪ್ರಾರ್ಥನೆ

15 ಅನಾಖ್ವಾಜೆಧಿ ಕೆದೆ ಮೇ ಪ್ರಭು ಯೇಸುಮ ತುಮೆ ರಾಖಿರಾಖ್ಯತೆ ವಿಶ್ವಾಸ್ ಅಜು ಖ್ವಾರಸ್ ದೇವ್ ಅದ್ಮಿವ್‌ಪರ್ ತುಮೆ ದೆಖಾಡನಿ ಪ್ಯಾರ್‌ನಿ ಬಾರೇಮ ಖ್ವಮ್‌ಜಿನ್,

16 ಮೆ ತುಮಾರಖ್ವಾಜೆ ಮಾರಿ ಪ್ರಾರ್ಥನೆಮ ಬಿಂತಿಕರಾನಿ ವಖ್ವಾತೆ ದೇವ್ ಲಗತ್ತರ್ ಧನ್ಯವಾದ್ ಕರುಸ್.

17 ಅಪ್ಪೊಪ್ರಭು ಯೇಸು ಕ್ರಿಸ್ತನೊ ದೇವ್‌ಬಿ ಮಹಿಮೆನೊ ಬಾಬಿ ಇನಿ ಇನಿ ಬಾರೇಮ ಪೂರ ಅಕ್ಕಲ್‌ನ ತುಮುನ ದೀನ್ ದರ್ಶನಾನು ಆತ್ಮನ ದೈವಾದೆಕರಿ ಪ್ರಾರ್ಥನೆ ಕರುಸ್.

18 ಮೇ ಬೋಲಿಲಾವನು ಶಾತ್‌ಕತೊ ತುಮಾರ ದಿಲ್ನ ಡೋಳಾನ ಉಜ್ವಾಖ್ ಕರೀನ್, ಇನಿ ಬುಲಾವ್ಣಿನ ಭರೋಖ್ವೊ ಕೆಥಾನು ಕರೀಬಿ ಅಜು ದೇವ್ ಅದ್ಮಿವೋಮ ಲ್ಹಾತೆ ಶೊತ್ಸಿ ಮಹಿಮೆ ಕೆಥಾನು ಲ್ಹಾ ಕರಿ

19 ಅಜು ವಿಶ್ವಾಸ್‌ಕರವಾಳ ಅಪ್ಪುನ ಇನಿ ತಾಖತ್ ಕೆತ್ರೆ ಊಚು ಹುಯಿರ್ದೊಸ್, ಯೋ ಅಪ್ಪಾಮ ಕಾಮ್ ಕರಸ್. ಆ ಶಕತ್ ಅಪ್ಪಾಮ ಮೋಟಿ ಶಕತ್ನುಬಿ, ಕಾಮ್ ಕರಾನುಬಿ ಹುಯಿರ್ದೊಸ್.

20 ಇನಿ ಮಹಿಮೇನಿ ಶಕತ್ಥಿನ್ ಕ್ರಿಸ್ತನ ಮರಣ್‌ಧು ಉಠಾಡಿನ್, ಹರೇಕ್ ರಾಜ್ಯ ಅಧಿಕಾರ್, ರಾಜ್‌ಭಾರ್ ಚಲಾವವಾಳನ ಸೋಗಾಮ ಇನ ಖ್ವಾವಿಬಾಜುಮ ಬೆಖ್ವಾಡಿಲಿದೊ.

21 ಕ್ರಿಸ್ತನಿ ಅಧಿಕಾರ್, ಶಕತ್ ಆ ಜಗತ್‌ಮಾಸ್ ಕಾಹೆತೆಸ್ ಅಗಾಡಿ ಆವ್‌ಶೇತೆ ಜಗತ್‌ಮ ಲ್ಹಾತೆ ಖ್ವಾರ್ ಜಣನ ಉಪ್ಪರ್‌ಬಿ ಅಖ್ವಿನಾಮ್ ಉಪ್ಪರ್‌ಬಿ ಪರಲೋಕ್‌ಮ ಇನ ಇನು ಖಾವಿಬಾಜುಮ ಬೆಖ್ವಾಡಿಲಿದೊ.

22 ಅತ್ರೇಸ್ ಕಾಹೆತೆ ದೇವ್ ಅಖ್ವಾಸ್ನ ಯೇಸು ಕ್ರಿಸ್ತನ ಗೋಡಾನ ಹೇಟ್‌ನಾಖ್ವೊ ಅಜು ಸಬೆನ ಖ್ವಾಜೆ ಯೋ ಅಖ್ವಾನಪರ್ ಇನ ಮುಡ್‌ಕು ಕರಿ ಬಣಾಯೊ.

23 ಸಬೆ ಕ್ರಿಸ್ತನು ಶರೀರ್ ಹುಯಿರಲ್ಲ್ವಸ್, ಅಖ್ವಾಸ್ನ ಅಖ್ವಿ ತರಿಕಾಮಾಬಿ ದೈವಾಳಧಿ ಯೊ ಭರ್ಪೂರ್ ಹುಯಿರಲ್ಲ್ವಸ್.

2

ಮರಣಾಧಿ ಜಿವ್ವಭಣಿ

1 ತುಮೆ ತುಮಾರು ಅವಿಧೇಯ ಬಿಜು ಪಾಪ್ಪಖ್ವಾಜೇಧಿ ಆತ್ಮಿಕ್ ಪರಕ್ಕಮರಿಗಯಧ.

2 ಅಗ್ಗಳ್ ತುಮೆ ಆ ಜಗತ್ತಿ ರೀತಿಧೀಬಿ, ವಹಿರಾನ ಗೋಳಾಮ ಅದಿಕಾರ್ ಚಲಾವತೆ ಅದಿಪತಿನ ಕತೊ ವಿಧೇಯ ಕೊಹುವಾಂತೆ ಲಡ್ಡಾವಮ ಹಮ್ಮೆ ಚಲಾವತೆ ಆತ್ಮನಿಘೋಣಿ ಜಿವ್ವು ಚಾಲಾಯ.

3 ಪಹಿಲೆ ಅಪ್ಪೇಬಿ ಇವ್ವಿನಿತರಸ್ ಥಾ, ಶರೀರ್‌ನು ಆಖ್ವಾದಾಖ್ವಾನ್ ಪೂರ ಕರಾನಟೀಕೆ ಅಪ್ಪೆ ಕೊಶೀಷ್ ಕರುಕರ್ತಧ. ಶರೀರ್‌ನ ಆಖ್ವಾಪು ಪಡೀನ್, ಶರೀರ್ ಅಜು ದಿಲ್ಲಿ ಆಖ್ವಾನ್ ಅಪ್ಪೆ ಕರ್ಯಾ ಇವ್ವಿಲ್ಲಂದಾನಿತರ ಅಪ್ಪೇಬಿ ಜಿನು ಅಲಕನಿಘೋಣಿ ದೇವ್ವ ಇರಾದಮ ಪಡ್.

4 ಕತೋಬಿ ದೇವ್ವಿ ಗೋರ್ ಘಣಿಮೋಟಿ ಅಪ್ಪಖ್ವಾಜೆ ಜಾಖ್ವಿತ್ ಪ್ಯಾರ್ ವತಾಳಿರಾಖ್ವೊಸ್.

5 ಖರಾಬ್ ಕಾಮ್ನು ಖ್ವಾಜೇಧಿ ಆತ್ಮಿಕ್ ಪರಕ್ಕ ಮರಿಗಯಥಾತೆ ಅಪ್ಪುನ ಕ್ರಿಸ್ತನ ಜೋಡೆ ಜಿವಾಡ್ವೊ ಆ ರಕ್ಷಣೆ ತುಮೆ ಲೀರಾಖ್ವಾಸ್ತೆ ದೇವ್ವಿ ವಾರ್ಖ್ವೇಧಿಸ್.

6 ಕ್ರಿಸ್ತ ಯೇಸುನ ಗಳಜೋಡ್ವ ಅಪ್ಪುನ ಜಿವ್ವು ಉರಾಡೀನ್ ಪರಲೋಕ್‌ಮ ಬೆಖ್ವಾಡ್ವೊ.

7 ಇನೆ ಅಪ್ಪುನ ಕ್ರಿಸ್ತ ಯೇಸುಮ ಆ ಹಗಾಮ್ಬಾಬಿ ಅಜು ಆವ್‌ಶೇತೆ ಅಖ್ವಾ ಹಗಾಮ್ಬಾಬಿ ಬೋಲಾನ ಕೊಹೋಯ್ವಿತೆ ಎತ್ರ ಇನಿ ಮೋಟಿ ವಾರ್ಖ್ವೊಬಿ ಲಾಡ್‌ಬಿ ದೈವಾನಖ್ವಾಜೆ ಇನೆ ಅಮ್ ಕರಯ್ವೊ.

8 ವಿಶ್ವಾಸ್‌ನಿ ಕೃಪೆಧಿಸ್ ತುಮೆ ರಕ್ಷಣೆ ಲೀರಾಖವಾಳ ಹುಯಿರಲ್ಲ್ವಸ್. ಆ ಬರ್ಘಾವ್ವಿ ಅಪ್ಪಕಾಮ್ನು ಫಲ್‌ಕಾಹೆ, ಯೊ ದೇವ್‌ನು ಧರಮಸ್.

9 ಆ ರಕ್ಷಣೆ ಕೆಹೂಬಿ ಅಲ್ಪು ಕಾಮ್‌ಧಿ ಹುಯುತೆ ಕಾಹೆ, ಇನಖ್ವಾಜೆ ಇವ್ಣು ಇವ್ಣೆಸ್ ಖ್ವಿಲ್ಯಾವಾನು ಜರೂರತ್ ಕೊಯ್ನಿ.

10 ಅಪ್ಲೆತೊ ದೇವ್ನೆ ಕರೊಯ್ತೆ ಬಣಾವಟ್‌ಅಖ್ಣು. ಕ್ರಿಸ್ತ ಯೇಸುಮ ಅಲ್ಪು ಕಾಮ್‌ಖಾರು ಕರ್ತಹುಯಿನ್ ಜಿವ್ಣುಕರಿ ಇನೆ ಪಹಿಲೆ ಖ್ವಿಜ್‌ಕರೊಯ್ತೆ ಇಮ್ನುಸ್ ದೇವ್ನೆ ಅಪ್ಪುನ ಉಬ್‌ಜೈರಾಖ್ಯೋಸ್.

ಕ್ರಿಸ್ತಮ ಏಕ್

11 ಪೈದಾಖ್ಲ ಥು ಯೆಹೂದ್ಯರ್‌ಕಾಹೆತೆ ತುಮೆ ಯೆಹೂದ್ಯರ್‌ಧಿ ಖ್ವಿತ್ನ ಕರೈಲಿದ ಕೊಯ್ನಿತ್ ಹಮಾರು ಹಮೇಸ್ ಖ್ವಿತ್ನ ಕರೈಲಿದಹುಯ ಕರಿ ಬೋಲಿಲೆವೊಸ್. ಅಗ್ಗ್‌ ತುಮೆ ಶಾತ್ ಹುಯಿರ್ದಾಧಕರಿ ಯಾದ್‌ಕರಿಲಾವನ ಖ್ವಾಜೆ ಪರ್ಖ್ವಾ ಅದ್ವಿ ಇವ್ಣ ಶರೀರ್ಮ್ ಹುಯಿರ್ದಾವನು ಆ ಏಕ್ ಕಾಮ್ ಹುಯಿರ್ದಾಸ್.

12 ತ್ಯೊ ಹಗಾಮ್ ತುಮೆ ಕ್ರಿಸ್ತಧಿ ಅಲಕ್ ಹುಯಿರ್ದಾಧ, ಇಸ್ರಾಯೇಲ್‌ವಾಳಾನಿ ಹಕ್‌ಮ ಕೊಹುಯಿರ್ದಾಧಾನಿ. ದೇವ್ ಇನ ಅದ್ವಿನ್ ಜೋಡೆ ವಾಗ್ದಾನ್ ಕರಿರಾಖ್ಯೊತೆ ಒಪ್ಪಂದಾಮ ತುಮೆ ವಾಟೊ ಹುಯಿರ್ದಾಧ ಕೊಯ್ನಿ ಅಜ್ಜು ತುಮೆ ಆ ಜಗತ್ ಭರೋಖ್ವಾಮ ಥಾ. ಅಜ್ಜು ತುಮೆ ದೇವ್ನ್ ಮಾಲುಮ್ ಕರಿರಾಖ್ಯಾಧಕೊಯ್ನಿ.

13 ಹಮ್ ತುಮೆ ಏಕ್ ಘಡಿ, ದೇವ್‌ಧಿ ದೂರ್ ಹುಯಿರ್ದಾಧ. ಕ್ರಿಸ್ತ ಯೇಸುನ ಲೋಯಿಧೀಸ್ ಇನ ಗಳ್‌ಜೋಡ್ ಹುಯಿಗಾತೆ ಇನಖ್ವಾಜೆ ದೇವ್ನ್ ಖನ್ನೆ ಅಪ್ಪುನ ಲೈರಾಖ್ಯಾಸ್.

14 ಯೆಹೂದ್ಯರ್‌ಬಿ ಯೆಹೂದ್ಯರ್ ಕೊಯ್ನಿತ್ ಇವ್ಣುನ ಏಕ್‌ಪರ್ ಏಕ್ ಕರೀನ್ ಯೋಸ್ ಅಪ್ಪುನ ಶಾಂತಿ ದೈವಾಳೊ ಹುಯಿರೋಸ್. ಕಿಮ್ ಕತೊ ಇವ್ಣ ಬೀಚ್ಚ ಏಕ್ ಭೀತ್‌ನಿತರ ಥು. ಕತೋಬಿ ಕ್ರಿಸ್ತ ಇನು ಶೊಂತ್ ಶರೀರಾನ್ ಬಲಿದಾನ್ ದೇತೊಹುಯಿನ್ ಯೊ ವಹೇರನ್ ಭೀತ್‌ನ ರಡ್ಕಾಯೊ.

15 ಇನೆ ಧರ್ಮಶಾಸ್ತ್ರ ಅಜ್ಜು ನಿಯಮ್‌ನಿ ಜೋಡ್ಕ ಯೊ ಭೀತ್ ರಡ್ಕಾಯೊ. ಅಮ್ ಇನ ಗಳ್‌ಜೋಡ್ಕ ಭೇ ಖೂಮ್ಮ ಇನಜೋಡೆ ಏಕ್ ನವಿ ಖೂಮ್‌ಕರಿ ಮ್ಹೇಲಾನಖ್ವಾಜೆ ಅಮ್ ಸಮಾಧಾನ್ ಕರೊಯ್.

16 ಇನ ಮರಣ್‌ಧೀಸ್, ಕ್ರಿಸ್ತ ಶಿಲ್‌ಬೆಪರ್ ಭೇ ಖೂಮ್ಮ ಎಕ್ಕ್‌ಸ್ ಶರೀರ್ ಕರಿನ್ ಇವ್ವುನ ದೇವ್ ಜೋಡೆ ರಾಜಿ ಕರೈಯ್.

17 ಆಬಿ ಕಾಹೆತೆ ಯೊ ಅಯಿನ್ ದೂರ್ ಹುಯಿರ್ದ್ಲಾತೆ ತುಮೂನಾಬಿ ಅಙ್ಗು ಖನ್ನೆ ಹುಯಿರ್ದ್ಲಾತೆ ಯೆಹೂದ್ಯರ್‌ನಾಬಿ ಸಮಾಧಾನ್ನಿ ಸುವಾರ್ತೆನ ಬೋಲ್ಯೊ.

18 ಇನಾಖ್ವಾಜೆ ಕ್ರಿಸ್ತಧಿ ಯೆಹೂದ್ಯರ್ ಅಙ್ಗು ಯೆಹೂದ್ಯರ್‌ಕಾಹೆತೆ ಅದ್ವಿಹಮೆಬಿ ತುಮೆ ಎಕ್ಕ್‌ಸ್ ಆತ್ಮಧಿ ಬಾಕನ ಆವಾನ ವಾಟ್‌ಹುಯು.

19 ಅಮ್‌ರ್ದ್ವಾಪರ್ ತುಮೆ ಹಮ್ಮೆ ಬಿಜ್ಜ ದೇಖ್ವಾಳ ರ್ದ್ವೊ ಯೆಹೂದ್ಯರ್ ಕಾಹೆತೆ ರ್ದ್ವೊ ನಾ ಹುಯಿರ್ದ್ಲೆಣುತೆ ದೇವ್ ಅದ್ವಿಯೇನ ಜೋಡೆ ಎಕ್ಕ್‌ಸ್‌ಗೊವಾಳಬಿ ದೇವ್ ಘರ್‌ವಾಳಬಿ ಹುಯಿರ್ದ್ಲಾಸ್.

20 ಅಪೊಸ್ತಲಬಿ ಅಙ್ಗು ಪ್ರವಾದಿಖ್ವಾರುಬಿ ಕರಿ ಬೋಲಾನು ಹದಿಪಾಯಪರ್ ತುಮೆ ಘರ್‌ನಿಘೋಣಿ ಭಂದ್ಯೆರ್ದ್ಲಾಸ್. ಕ್ರಿಸ್ತ ಯೇಸುಸ್ ಮುಖ್ಯ ಹುಯಿರ್ದ್ಲೆನೈ ಕೋಣಾನೊಬಂಡೊ ಹುಯಿರ್ದ್ಲಾಸ್.

21 ಇನಾಮ ಘರ್‌ನು ಅಖ್ವಾಸ್ ಭಾಗ್‌ಖ್ವಾರು ಏಕ್‌ಧಿ ಏಕ್ ಮಳಿನ್, ಘರ್ ಭಡೀನ್ ಪ್ರಭುಮ ಪರಿಶುದ್ ಮಂದಿರ್ ಹುವಾಸ್.

22 ಕ್ರಿಸ್ತಮ ತುಮೇಬಿ ಪವಿತ್ರಾತ್ಮಧಿ ದೇವ್ ರ್ದ್ವಾನು ಮಂದಿರ್ ಹುವಾನಖ್ವಾಜೆಧಿ ಹಮಾರ ಜೋಡೆ ಭಂದೌಕರಾಸ್.

3

ಯೆಹೂದ್ಯರ್ ಕಾಹೆತೆ ಇವ್ವ ಇಘ್‌ಮ ಪೌಲಾನಿ ಸೇವೆ

1 ಅಮ್‌ರ್ದ್ವಾಪರ್ ಪೌಲ ಹುಯಿರ್ದ್ಲೆತೆ ಮೆ ಯೆಹೂದ್ಯರ್‌ಕಾಹೆತೆ ತುಮಾರ ಖ್ವಾಜೇಧಿ ಕ್ರಿಸ್ತ ಯೇಸುನಖ್ವಾಜೆ ಖ್ವಾರ್ಕೊಟ್‌ಮ ರ್ದ್ವಾಳೊ ಹುಯಿರ್ದ್ಲೆಸ್.

2 ತುಮಾರ ಅಱ್ವುಕಾಮ್ನ ಖ್ವಾಜೇಧಿ ಛೇತೆ ಜಿಮ್ಮೆದಾರಿನ ದೇವ್ ಇನಿ ವಾರ್‌ಖ್ವೇಧಿಸ್ ಮನ ದೀರಾಖ್ಯೊಸ್‌ಕರಿ ತುಮೆ ಖ್ವಮ್‌ಜಿರಾಖ್ಯಾಸ್,

3 ದೇವ್ವೆ ಇನ ದಿಲ್ವ ಮಾಯ್ನನ ಬೋಲಿದಿದೊ. ಅನಿಬಾರೇಮ ಮೆ ಪಹಿಲೆಸ್ ತುಮುನ ಥೋಡಿ ವಾತೆಥಿ ಲೀಖಿನ್ ಮೋಕ್ಲಿರಾಖ್ಯೊಸ್.

4 ಅಜ್ಜು ಮೆ ಲೀಖಿರಾಖ್ಯೊಸ್ತೆ ಇನ ತುಮೆ ಬರಾಬರ್‌ಥಿ ಫಡೀನ್ ದೇಖ್ಯಾತೊ ಮಾರಮ ಕ್ರಿಸ್ತನಿ ಬಾರೇನು ಮಾಯ್ನನ ತುಮೇಬಿ ಮಾಲುಮ್ ಕರೈತು.

5 ಗಯೋತೆ ಹಗಾಮ್ ಅದ್ಮಿವೊನ ಆ ಮಾಯ್ನೊ ಕೊಬೋಲಾಯುನಿ ಕತೋಬಿ ದೇವ್ವೆ ಇನ ಪವಿತ್ರಾತ್ಮಥಿ ಅಪೊಸ್ತಲರ್‌ ಅಜ್ಜು ಪ್ರವಾದಿಖ್ವಾರನ ಮಾಲುಮ್ ಕರೈರಾಖ್ಯೊಸ್.

6 ಯೊ ಮಾಯ್ನೊ ಖಿವುಕತೊ, ಯೆಹೂದ್ಯರ್‌ಕಾಹೆತೆ ಅದ್ಮಿ ಜಿನು ಸುವಾರ್ತೆಥಿ ಕ್ರಿಸ್ತಯೇಸುಮ ದೇವ್ವೆ ಅದ್ಮಿನಜೋಡೆ ವಾಗ್ದಾನ್‌ಮ ವಾಟೊಲ್ಯಾವಳ ಹುಯಿರ್‌ಲ್ಯಾಸ್.

7 ದೇವ್ವೆ ಇನಿ ಕಾಮ್ ಕರಾನಿ ಶಕಥ್ಲಿ ಮನ ದೆವಾಯುತೆ ಇನಿ ದಾನ್ನಿ ವಾರ್‌ಖ್ಲೆಥಿ ಮೆ ಆ ಸುವಾರ್ತೆನ ಬೋಲವಾಳೊ ಸೇವಕ್ ಹುಯೊ.

8 ಅಖ್ಯಾಸ್ ದೇವ್ವೆ ಅದ್ಮಿಮ ಕಮ್‌ಶಿಲ್ ರೆಡ್ಡಿಯೊತೋಬಿ ದೇವ್ವೆ ಕ್ರಿಸ್ತನು ವಾರ್‌ಖ್ವಾನಿ ಸುವಾರ್ತೆನ ಯೆಹೂದ್ಯರ್‌ಕಾಹೆತೆ ಅದ್ಮಿನ ಬೋಲಿ ವತಾಳನಖ್ವಾಜೆ ವಖ್ವತ್‌ನ ಮನ ದೀರಾಖ್ಯೊಸ್.

9 ಬಿಜ್ಜು ದೇವ್ವೆ ಅದ್ಮಿನ ದೇವ್ವೆ ಗಪ್ಲತ್‌ನಿ ಖ್ವೊಜ್‌ನ ಖಿವುಕರಿ ಅಜ್ಜು ಯೊ ಪ್ರಭಾವ್ ಹುವಾನಿತರಾನು ದೇಖಾನಖ್ವಾಜೆ ಕರೈಲ್ಯೊ ಅಖ್ಯಾಸ್ನ ಉಬ್‌ಜಾಯೊತೆ ದೇವ್ ಪಾಲ್ಲ್ಯೊಲ್ಯಾಹಗಾಮ್ ಇನು ಗಪ್ಲತ್‌ನ ಲಪಾಡಿರಾಖ್ಯೊಥೊ.

10 ಇನಖ್ವಾಜೆ ಆ ಹಗಾಮ್ ಸಬೇಥಿ ದೇವ್ವದೂತರ್‌ ಚಲಾವವಾಳು ಅಜ್ಜು ಪರಲೋಕ್ ರಾಜ್ಯನು, ಅದಿಕಾರಿಖ್ವಾರು ಇನು ಗ್ಯಾನ್ ಬಿಜಿ ಪರಕ್ ಶಿಕಾಡನಿಫೋಣಿ ಹೋಣುಕರಿ ಬೋಲಾನು ಇನಿ ಆಖ್ವೆ ಹುಯಿರ್‌ಲ್ಲೆಥಿ

11 ದೇವ್ವೆ ಅಪೊ ಪ್ರಭು ಕ್ರಿಸ್ತಯೇಸುಥಿ ಭರ್‌ಪೂರ್ ಕರೈಲ್ಯೊತೆ ಇನಿ ಹರ್‌ಹಮೇಶಾನಿ ಖ್ವೊಜ್‌ನಿ ಪರಕ್ ಆ ಅಖ್ವು ಕರೈಲ್ಯೊ

12 ಕ್ರಿಸ್ತನ ಗಳ್‌ಬೋಡ್ತಾಬಿ ಅಜ್ಜು ಇನಾಪರ್ ರಾಖಿರಾಖ್ಯೆತೆ ಅಪ್ಪಿ ವಿಶ್ವಾಸ್‌ಥಿ ಅಪ್ಪೆ ದೇವ್ವೆ ಖ್ವಾಮ್ಲೆ ಭಾಲಿಥಿ ಅಜ್ಜು ಆತ್ಮ ವಿಶ್ವಾಸ್‌ಥಿ

ಜ್ಞಾವನಿತರ ಹುಯು.

13 ಇನಾಖ್ವಾಜಿ ತುಮಾರಖ್ವಾಜಿ ಮನಹುಯುತೆ ಖ್ವಿತಾಪ್ಪಿನ ದೇಖಿನ್ ತುಮೆ ಹಿಮ್ತು ನಾ ಹರ್ಮ್ಕರಿ ತುಮುನ ಗಿಂಗೈಲೆವುಸ್. ಆ ವದೆಖ್ವಿಖ್ವಾರು ತುಮುನ ಮರ್ಯಾದಿನು ಹುಯಿರ್ಮ್.

ಕ್ರಿಸ್ತನು ಪ್ಯಾರ್

14 ಅನಖ್ವಾಜಿ ಬಾನ ಖ್ವಾಪ್ಪೆ ಮೆ ಗುಡ್‌ಘ್ ಟೇಕ್ಯೊ

15 ಆ ಜಮೀನ್‌ಪರ್ ಅಜು ಸೊರ್ಗಾಮ ಛಾತೆ ಹರೇಕ್ ಕುಟಮ್ ಅನೇಥಿ ಖ್ವಾಚ ನಾಮ್ ಲೀಲೆಸ್.

16 ಮೆ ದೇವ್ ಧನ್‌ದಾಲಧಿ ರ್ವವಾನು ಮಹಿಮೆಥಿ ಪ್ರಾರ್ಥನೆ ಕರುಕರೂಸ್. ಯೊ ಪವಿತ್ರಾತ್ಮಧಿ ದಿಲ್ಮಮಹಿ ತಾಖತ್ ಹುವಾನ ವಿಶೇಷ್ ಶಕತ್‌ದ್ಯವಾದೆ,

17 ಕ್ರಿಸ್ತ ತುಮಾರ ವಿಶ್ವಾಸ್‌ಧಿ ತುಮಾರ ದಿಲ್ಮ ಜಿವಾದೆಕರಿಬಿ, ಯೊ ಇನಿ ಮಹಿಮೆನಿ ಶಕತ್ ದ್ಯವಾದೆ.

18 ತುಮೆ ಪ್ಯಾರಮ ತಳ್‌ಗಾರಿ ಭೀರೇವ್ಣು, ದೇವ್ ಅದ್ವಿನ ಜೋಡೆ ಕ್ರಿಸ್ತನು ಪ್ಯಾರ್ ಕೆತ್ರೆ ಚೌಡು, ಲಾಂಬು, ಊಚ್ಚು ಗಧಾರ್, ಛಾಕರಿ ಮಾಲುಮ್ ಕರಾನಿ ಶಕತ್ ತುಮಾರಮ ರ್ವವಾದೆ.

19 ಖ್ವಿಯಾಲ್‌ಥೀಬಿ ಘಣು ಜ್ಞಾಖ್ವತ್ ಕ್ರಿಸ್ತನಿ ಪ್ಯಾರ್ ಮಾಲುಮ್ ಹುವಾದೆ, ದೇವ್ ಭರ್‌ಪೂರ್ ಸ್ವಭಾವ್‌ಧಿ ಪೂರಹುವಾದೆ.

20 ಅಪ್ಪಾಮ ಕಾಮ್ ಕರಾಸ್ತೆ ಇನು ಶಕತ್ ಪರಕ್ ಅಪ್ಪೆ ಮಾಂಗಧಿಬಿ ಸೋಚಾಧಿಬಿ ಕೆತ್ರೆಸ್ಕಿ ಜ್ಞಾಖ್ವತ್ ಕರಾನ ಶಕತ್‌ವಾಳೊ ಹುಯಿರ್ಮ್‌ಸ್ತೆ ದೇವ್.

21 ಸಬೆಮಾಬಿ ಕ್ರಿಸ್ತ ಯೇಸುಮಾಬಿ ಜಗ್‌ಜಮಾನಮಾಬಿ ಪಿಥಿನ್ ಪಿಥಿಮಾಬಿ ಮಹಿಮೆ ಹುವಾದೆ. ಆಮೆನ್.

4

ಶರೀರ್ಮ್‌ಕ್ ಹುಯಿರ್ಮ್‌ವನು

1 ಇನಖ್ವಾಜೆ ಪ್ರಭುನ ಸೇವೆನಖ್ವಾಜೆ ಖೈದಿ ಹುಯಿರ್ದೊಸ್ತೆ ಮೆ ತುಮೂನ ಬೋಲಿಲೆವ್‌ಸ್ ಶಾತ್‌ಕತೊ ದೇವ್ ತುಮುನ ಬುಲಾವನಿವಖ್ವಾಜೆ ತುಮೆ ದೇವ್‌ಥಿ ಬುಲೈರಾಸ್ತೆಖ್ವಾಜೆ ಯೊ ಬುಲಾವ್ಣಿನ ಲ್ಹಾಯೀಕ್ ಹುಯಿನ್ ಜಿವ್ಪುಕರೊ.

2 ತುಮೆ ದೇವ್‌ಮ ಬುಲಾಯತೆ ಇನಖ್ವಾಜೆ ಹೇಟು ಹುಯಿರ್ದುವಾನು, ಶೇದೇವ್‌ಥಿ ರ್ವಾನು, ಖ್ವಮಾಳಿರ್ದವಾಳ ಹುಯಿನ್ ಪ್ಯಾರ್‌ಥಿ ಏಕ್‌ಥಿ ಏಕ್ ಖ್ವಮಾಳಿರ್ದವೊ.

3 ಸಮಾಧಾನ್ನಿ ಬಂಧನ್ಮ ಭಂದೈರ್ದವಾಳ ಹುಯಿನ್ ಪವಿತ್ರಾತ್ಮಥಿ ಹುವಾಸ್ತೆ ಒಗ್ಗಟೆನ ಬಫಾಡಾನಖ್ವಾಜೆ ಮನ್‌ಲಗಾಡೊ.

4 ತುಮೆ ದೇವ್‌ಮ ಬುಲಾವನಿವಖ್ವಾಜೆ ಖ್ವಾರು ಎಕ್ಕ್‌ಸ್ ಶರೀರ್‌ಮ ಮಳಿರ್ದವಾಳಬಿ, ಎಕ್ಕ್‌ಸ್ ಪವಿತ್ರಾತ್ಮಥಿ ರ್ದವಾಳಬಿ, ಎಕ್ಕ್‌ಸ್ ಭರೋಖ್ವಾನಟೀಕೆ ಬುಲೈರ್ದಾಸ್.

5 ತುಮುನ ಯೊ ಎಕ್ಕ್‌ಸ್ ಪ್ರಭು, ಎಕ್ಕ್‌ಸ್ ವಿಶ್ವಾಸ್, ಎಕ್ಕ್‌ಸ್ ಬ್ಯಾಪ್ತಿಸ್ಮ್

6 ಬಾ ಹುಯಿರ್ದೊಸ್ತೆ ಎಕ್ಕ್‌ಸ್ ದೇವ್‌ಬಿ, ಅಖ್ವಾನ ಪ್ರಭು ಹುಯಿರ್ದವಾಳೊ, ಖ್ವಾರೇಥಿನ್ ಕಾಮ್ ಕರಾವವಾಳೊಬಿ, ಖ್ವಾರಮಸ್ ಜಿವ್ಪುಕರವಾಳೊ ಹುಯಿರ್ದೊಸ್.

7 ಕತೋಬಿ ಕ್ರಿಸ್ತನಿ ವರಾನಿ ಆಳ್ತಿನಿ ಪರಕ್ಮಾಸ್ ಹರೇಕ್ ಭಣಾನ ವಾರ್‌ಖ್ವಾನಿ ವರ ದೆವೈರ್ದೊಸ್.

8 ಇನಾಖ್ವಾಜೆ ಪವಿತ್ರ ದಪ್ತರಮ ಅಮ್ ಬೋಲೈರ್ದೊಸ್, “ಯೊ ಊಚಿ ಸ್ಥಾನ್‌ಪರ್ ಲ್ಲಡಿಭಾವನಿ ವಖ್ವಾಜೆ, ಯೊ ಖೈದಿಖ್ವಾರಾನ ಬಂಧಿ ಕರೈಜೈನ್ ಅದ್ಮಿಖ್ವಾರಾನ ಇನಾಮ್ ದಿದೊ”.

9 “ಲ್ಲಡಿಗಯೊ” ಕರಿ ಬೊಲಾನಿ ಮತ್ಲಬ್ ಶಾತ್‌ಕತೊ? ಯೊ ಜಮೀನ್ಮ ಗಧಾರಮ ಉತ್‌ರೈಕರಿ ಬೊಲಾನಿತರ ಹುವಾಸ್.

10 ಉತ್ರಿನ್ ಆಯೊಹುಯೊ, ಖ್ವಾರುಸ್ ಭರಾನಖ್ವಾಜೆ ಅಖ್ವಾ ಜಗತ್‌ಥಿಬಿ ಊಫಾಮ ಲ್ಲಡಿಗಯೊಹುಯೊ ಹುಯಿರ್ದೊಸ್.

11 ಯೊ ಹೈರೋತೆ ಇನಾಮ್ ದೈವಾಳೊಬಿ ಹುಯಿರ್ದೊಸ್ ಕತೊ ಯೊ ಥೋಡಭಣಾನ ಅಪೊಸ್ತಲರ್ ಕರಿಬಿ, ಥೋಡಾನ ಪ್ರವಾದಿಕರಿಬಿ,

ಧೋಡಜ್ಞಾನ ಸುವಾರ್ತೆ ಬೋಲವಾಳುಕರಿಬಿ, ಧೋಡಜ್ಞಾನ ಸಬಾಪಾಲಕರ್ ಕರಿಬಿ, ಶಿಕಾಡವಾಳೊ ಕರಿಬಿ ನೆಮಿಸಾಯೊ.

12 ಯೋ ಕ್ರಿಸ್ತನ ಶರೀರಮ ಎಕ್ಟುಹುವಾನಖ್ವಾಜೆ ಅಖ್ವಾ ದೇವ್ವ ಅದ್ಮಿವನ್ ಕ್ರಿಸ್ತನ ಸೇವೆನ ಕಾಮ್ನಖ್ವಾಜೆ ತಯಾರ್ ಕರಾನ ಟೇಕೆ ಯೋ ಅಮ್ ಕರಯ್ತೊ.

13 ಇನಖ್ವಾಜೆ ದೇವ್ವ ಅದ್ಮಿನ ಅಕ್ಲಿಕರೀನ್ ದೇವ್ವ ಛಿಯ್ಯಾನ ಕಾಮ್ ಕರಾನಖ್ವಾಜೆ ತಯಾರ್ ಕರ್ನುಕರಿಬಿ ಅಜ್ಜು ಯೇಸುಕ್ರಿಸ್ತನು ಶರೀರ ಹುಯಿರಯ್ತೆ ಸಬೆ ಭಡಾದೆಕರಿ ಇನೆ ಅವ್ವುನ ನೇಮಶಾಯೊ.

14 ಇನಾಖ್ವಾಜೆ ಬೋಲಿಲಾವನು ಶಾತ್‌ಕತೊ ಅಪ್ಪೆ ಹಂಕೇಥು ಅಡ್ಡಾಣಿ ನಾ ಹುಯಿರಯ್ತೆವ್ವತ್ತೆ, ಖರಾಬ್ ಅದ್ಮಿನ ರಗಾವ್ಣಿಮಾಬಿ, ಗಲ್ತಿಸೋಚ್‌ಮ ಪಡೀನ್, ಅಲಕ್ ಅಲಕ್ ಭೋದನ್‌ಥಿ ಧೋಕಹುಯಿನ್ ವಹಿರೊ ಕೀಕಡ್‌ಕಿ ತೀಕಡ್ ನಾಭಾವಾಳ ಹುಯಿರಯ್ತೆಣು.

15 ಕತೋಬಿ ಪ್ಯಾರಮ ಖ್ವಾಚುಬೋಲ್ತಹುಯಿನ್ ಹರೇಕ್ ವಾತೆವ್‌ಮಾಬಿ ಮುಡ್‌ಕ್ಯ ಹುಯಿರಯ್ತೆವ್ವತ್ತೆ ಕ್ರಿಸ್ತಮ ಭಡವಾಳ ಹುಯಿರಯ್ತೆ.

16 ಶರೀರಅಖ್ವು ಕ್ರಿಸ್ತಧಿ ಹರ್ ಕೀಲ್‌ಥಿ ಘಟ್ ಮಳಿರಯ್ತೆನ್, ಹರೇಕ್ ಖ್ವಂದೊಬಿ ಇನು, ಇನು ಕಾಮ್ ಕರಾಸೆಖ್ವಾಜೆ ಶರೀರ ಪ್ಯಾರಮ ಅಛಿನಿತರ ಭಡಾಸ್.

ಕ್ರಿಸ್ತಮ ನವು ಜಿವ್ವು

17 ಇನಾಖ್ವಾಜೆ ಮೆ ಪ್ರಭುಮ ತುಮುನ ಶಾತ್ ಬೋಲುಸ್‌ಕತೊ ಅಲಕ್ ಅದ್ಮಿಖ್ವಾರು ಚಾಲಾನಿಘೋಣಿ ಅನ ಅಗ್ಗಳ್ ನಾಭಾಲ್ವು. ಇವ್ಣೆ ಕಾಯ್ ಫಾಯಿದೊಕೊಂತೆ ಅಕ್ಕಲ್‌ವಾಳನಿತ್ರ ಚಾಲಿಲೆಸ್.

18 ಇವ್ಣೆ ದಿಲ್ ಅಂಧಾರಧಿ ಡಪೈರಯ್ತೆಸ್, ಇವ್ಣೆ ಇವ್ಣೆ ಕರೋರ್ ದಿಲ್‌ಥೀಬಿ ಅಜ್ಜು ಇವ್ಣಾಮ ಅಕ್ಕಲ್‌ಕೊಂತೆ ಖ್ವಾಜೇಥಿಬಿ ದೇವ್ ದೇಸೆ ಜಾನ್‌ಥಿ ದೂರ್ ಹುಯಿರಯ್ತೆ.

19 ಇವೆ ಖರ್ಮ್ ಮೈಂದಿನ್ ಇವ್ವುಇವ್ವುನ ಖರಾಬ್ ಆಖ್ವನ್ ದಿನಾಖನ್, ಹರೇಕ್ ಥರಾನು ಕಚಿಂಡ್ ಕಾಮ್‌ಅಖ್ವಾನ ನಿಕ್ಕಜಾನ್‌ಫಿ ಚಲಾವಸ್.

20 ತುಮೆತೋಬಿ ಕ್ರಿಸ್ತನಿ ಬಾರೇಮ ಇಮ್ಮು ಶಾಕ್ತಿ ಶಿಕ್ಯಾಕೊಯ್ನಿ.

21 ಶನಕತೊ ಖ್ವಾಚಮಾಬಿ ಇನಾಮಸ್ ಖ್ವಮ್‌ಜಿರಾಖ್ಯಾಸ್ ಅಜ್ಜು ಇನ ಪೀಲೆ ಜಾವಳ ತುಮುನ ಯೇಸುಮ ಛಾತೆ ಖ್ವಾಚನಿಫೋಣಿಸ್ ಶಿಕಾಡಿರಾಖ್ಯಸ್.

22 ಇನಖ್ವಾಜೆ ತುಮುನ ಶಿಕಾಡ್ಯತೆ ಭೋದನ್ ಶಾತ್‌ಕತೊ ತುಮೆ ತುಮಾರಿ ಅಗ್ಲಿ ಚಾಲ್‌ನಿತರಾನು ಜೂನಿ ಆದತ್‌ನ ಕಾಡಿನಾಖೊ; ಯೊ ಧೋಕ ಖೈರಾಖ್ಯಾಸ್ತೆ ಖರಾಬ್ ಆಖ್ವಾಡಿ ಭರೈರ್ಲ್ವಸ್. ಯೊ ನಾಶ್ ಹುಯಿಜಾವನು ಹುಯಿರುಸ್.

23 ಅಜ್ಜು ತುಮೆ ತುಮಾರು ದಿಲ್ ಮನ್ನನವು ಕರಿಲೆವೊ.

24 ಅಜ್ಜು ತುಮಾರು ತುಮೆ ನವಿ ಆದತ್‌ನ ಫೇರಿಲೆವೊ ದೇವ್ನಿಸ್ ಪರಕ್ ಅಜ್ಜು ಖ್ವಾಚಿಫೀಬಿ ನೀತಿನೂಬಿ, ಪರಿಶುದ್ ಹುಯಿನ್‌ಬಿ ಉಬ್ಬಿರ್ಲ್ವಸ್.

25 ಇನಾಖ್ವಾಜೆ ಝೂಟಿ ಬೋಲಾನು ಮ್ಹೇಲಿನ್ ಹರೇಕ್ ಭಣು ಇನ ಭೀಡೆವಾಳನ ಜೋಡೆ ಖ್ವಾಚಿಸ್ ಬೋಲೊ. ಶನಕತೊ ಆಪ್ಣೆಖ್ವಾರು ಎಕ್ವಸ್ ಶರೀರ್ಲ್ವ ಭಾಗ್ ಹುಯಿರ್ಲ್ವಾಸ್.

26 ಇರಾದೊ ಕರ್ಯತೋಬಿ ಪಾಪ್ ನಕೊಕರ್ತು, ದನ್ ಡುಬಾಫಿ ಪಹಿಲೆಸ್ ತುಮಾರೊ ಇರಾದೊ ಖರ್ತಿ ಹುಯಿಜಾವದೆ.

27 ಶೈತಾನ್ ಮೋಕ ನಕೊದಿಶು.

28 ಚೋರಿ ಕರಾವಾಳೊ ಚೋರ್ ಕರಾನು ಮೈಂದಿನ್ ರಾಬಿನ್ ಮಿನಡ್ಲಿ ಅಫ್ಲು ಕಮೈಕರೀನ್ ಜಿವ್ವು ಕರಾದೆ, ತದೆ ಗರೀಬ್ ಅದ್ಮಿನ ದ್ಯಾವಾನ ಇನ ಹಾತೆ ಉಶೆ.

29 ತುಮಾರ ಮ್ಹೋಡೆಫಿ ಖಿವು ಖರಾಬ್ ವಾತೆ ನಾ ಆವ್ಣು ಕತೋಬಿ ಭಕ್ತಿನ ಭಡಾವಾನಿ ಯೋವೇಳ್ ಬೋಲ್ವುತೆ ವಾತೆ ಹುಯಿರ್ಲ್ವೊ. ತುಮೆ ವಾತೆ ಬೊಲ್ಯಾತೊ ಖ್ವಮ್‌ಜಾವಾಳನಾಬಿ ಅಫ್ಲು ದೆಖಾವ್‌ಶೆ.

30 ದೇವ್ ಪವಿತ್ರಾತ್ಮನ ದುಖ್ ನಕೊ ಕರೊ. ಇನಾಮಸ್ ಛುಟ್ಕಾರ್‌ನ

ದನ್ನಖ್ವಾಜೆ ಮುದ್ರೊ ಲೀರಾಖ್ಯಾನ್ನಿ.

³¹ ಖ್ವಾರು ವಹೇರ್, ಇರಾದೊ, ಖೀಜ್, ಝಗ್‌ಡೊ, ಚಾವಾಣ್ಯ ಅನಖ್ವಾರನಬಿ ಹರೇಕ್ ಥರಾನು ಖರಾಬ್ ಕಾಮ್ನ ತುಮಾರೇಥಿ ಕಾಡಿನಾಖೊ.

³² ಇನ ಬದಲ್ ಏಕ್‌ಥಿಏಕ್ ದಯಕರವಾಳಬಿ, ಗೋರ್ ಕರವಾಳಬಿ ಹುಯಿರ್ದೆವೊ. ದೇವ್ನ ತುಮುನ ಕ್ರಿಸ್ತಮ ಮಾಪ್ ಕರೊತೆ ಇಮ್ಮಸ್ ತುಮೇಬಿ ಏಕ್‌ಥಿಏಕ್ ಮಾಪ್ ಕರೊ.

5

ಉಜಾಳಮ ಜಿವ್ಣು

¹ ದೇವ್ನ ಪ್ಯಾರ್‌ನ ಲಡ್ಕಹುಯಿರ್ದಾಸ್ ಇನಖ್ವಾಜೆ ಇನಿ ವಾಟ್‌ಪರ್ ಚಾಲವಾಳ ಹುಯಿರ್ದೆವೊ.

² ಕ್ರಿಸ್ತನೆ ಅಪ್ಪುನ ಪ್ಯಾರ್‌ಕರೀನ್ ಅಪ್ಪಖ್ವಾಜೆ ಇನುಯೋಸ್ ದೇವ್ನ ಥಪ್ಪಾರಬಿ ಕಾಣೆಕೆ ಹುಯಿನ್, ಬಲಿ ಸಮರ್ಪಣ್ ಹುಯೋತೆ ಪರಕ್ಮಸ್ ತುಮೇಬಿ ಪ್ಯಾರ್‌ಥಿ ಜಿವೊ.

³ ತುಮೆ ದೇವ್ನ ಲಡ್ಕ ಹುಯಿರ್ದಾಸ್ತೆ ಇನಖ್ವಾಜೆ ಪಾಪೇಲು ಕಾಮ್ ಅಜು ಖಿವಿ ಥರಾನು ಮೈಲು ನತರ್ ಪೈಶಾನಿ ಆಖ್ವಾರ್ದೆವೊ ಅಮ್ಮಿ ಖಬರ್ ತುಮಾರಮ ನಾರ್ಡೆವ್ಣು ಅಮ್ಮ ಖ್ವಾರೇಥಿ ದೂರ್ ರ್ಹವಾನುಸ್ ತುಮುನ ಅಚ್ಚು.

⁴ ಗಲೀಜ್ ವಾತಿ, ಬೇಕಾರ್ ವಾತಿ, ನಕ್ಲೆಕಾಡಿ ಹಾಖ್ವಾನು ಆಖ್ವಾರು ನಕೊ. ಆ ಅಮ್ಮಿ ಖ್ವಾಜ್‌ಕೊಂತೆ ಹುಯಿರ್ದಾಸ್. ಅನಬದಲ್, ತುಮೆ ದೇವ್ನ ಧನ್ಯವಾದ್ ಕರೊ.

⁵ ಪಾಪೇಲ ಕಾಮ್ನ ಜಾವಳೊ, ಖರಾಬ್ ಕಾಮ್ ಕರವಾಳು, ಮೂರತ್ನ ಪೂಜ್ ಕರವಾಳನಿ ಘೋಣಿನೊ ನಿಕ್‌ಳ್ ಜಾನ್ನೊ ರ್ಹವೊ ಇವ್ಣುನ ಕ್ರಿಸ್ತನಿ ಅಜು ದೇವ್ನ ರಾಜ್ಯಮ ವಾಟೊ ಕೊಯ್ತಿಕರಿ ತುಮಾರ ದಿಲ್ಮ ಘಟ್ರಿರ್ದವಾದೆ.

6 ಫಾಯಿದೊಕೊಂತೆ ವಾತೆಧಿ ಕೋಣೆಬಿ ತುಮುನ ನಕೊ ರಗಾವದೆ, ಅಮ್ಮು ಕಾಮ್ ಅಖ್ವಾನಖ್ವಾಜೆ ದೇವ್‌ನೊ ಇರಾದೊ ಇನಿ ವಾತೆನ ಮೀರಿನ್ ಚಾಲಸ್ತೆ ಇವ್ವ ಉಪ್ಪರ್ ಆವಸ್.

7 ಇನಾಖ್ವಾಜೆ ತುಮೆ ಇವ್ವ ಜೋಡ್ತು ಖ್ವಂಗೆ ನಕೊ ಕರೊ.

8 ಶನಕತೊ ತುಮೆ ಯೋಹಗಾಮ್ ಅಂಧಾರಮ ಥಾ, ಕತೋಬಿ ಹಮ್ಮೆ ತುಮೆ ಪ್ರಭುನ ಅದ್ನಿ ಹುಯಿರ್ದೆನ್ ಉಜಾಳವಾಳ ಹುಯಿರ್ದ್ವಾಸ್. ಉಜಾಳವಾಳನಿತರ ಚಾಲಿಲೆವೊ.

9 ಉಜಾಳನು ಫಲ್ ಅಲ್ಲಾಮಾಬಿ ನೀತಿಮಾಬಿ ಅಜ್ಜು ಖ್ವಾಚಿಮ ದೆಖಾವಸ್.

10 ಪ್ರಭುನ ಲ್ಹಾಯಕ್ ಶಾತ್‌ಕರಿ ಬೋಲಾನು ತರೀಪ್‌ಶ ಕರೀನ್ ಮಾಲುಮ್ ಕರಿಲೆವೊ.

11 ಕಾಯ್‌ಕೊಂತೆ ಅಂಧಾರನ ಕಾಮ್ ವಾಟೊವಾಳ ನಾ ಹುಯಿರ್ದೆಣುತೆ ಅನಬದಲ್ ಉಜಾಳಮ ದೆಖಾವನಿ ಘೋಣಿ ಕರೊ.

12 ಯೊ ಅದ್ನಿಖ್ವಾರು ಗಪ್ಲಧ್ಲಿ ಕರಾಸ್ತೆ ಕಾಮ್ ಅನಿಬಾರೇಮ ಬೋಲಾನು ಖ್ವಾಚಮಾಬಿ ಖ್ವರಮ್‌ಲಾಗಾನು ಹುಯಿರ್ದ್ವಾಸ್.

13 ಉಜಾಳಧಿ ಖ್ವಾರು ಕಾಮ್ ಖ್ವಾಘುಗುಣ್ ದೆಖಾವಸ್.

14 ಶನಕತೊ ಖಿವು ಅಲ್ಪಿನಿತರ ದೆಖಾವಸ್ಕಿ ಯೋಸ್ ದೆಖಾವಸ್, ಇನಖ್ವಾಜೇಧಿ ಬೋಲೈರ್ದ್ವಾಸ್. “ಖ್ವತೊರ್ದ್ವಾಳ ಉರಿಆವ್, ಮರಿರ್ದ್ವಾಳೆಧಿ ಮ್ಹೇಲಿನ್ ಉರೊ, ತದೆ ಕ್ರಿಸ್ತ ತುಮಾರಮ ಉಜಾಖ್ವ್ ಹುಯಿರ್ದೆಶೆಕರಿ ಇನಖ್ವಾಜೆ ಬೋಲೈರ್ದ್ವಾಸ್.

15 ಇನಖ್ವಾಜೆ ತುಮೆ ಚಾಲ್ ಚಲಣ್ಣಿ ಬಾರೇಮ ಹೊಷಾರ್‌ಧಿ ರ್ದ್ವೊ. ಬಿಣ್‌ಅಕ್ಲಿ ನಾ ಹುಯಿರ್ದೆಣುತೆ ಅಕ್ಲಿ ಹುಯಿನ್ ಜಿವೊ.

16 ಆ ಮೋಕಾನ ಉಪಯೋಗ್ ಕರಿಲೆವೊ. ಶನಕತೊ ಆ ದನ್ ಖ್ವಾರು ಖರಾಬ್‌ಧಿ ಭರಾಯುಹುಯು ಹುಯಿರ್ದ್ವಾಸ್.

17 ಅಜ್ಜು ಅಕ್ಕಲೊಕೊಂತೆ ಇವ್ವಿನಿತರ ನಾಚಾಲ್ತುತೆ ಪ್ರಭುನಿ ಮರ್ಜಿನ ಶಾತ್‌ಕರಿ ಮಾಲುಮ್ ಕರಿಲೆವೊ.

18 ದ್ರಾಕ್ಷಿನೊರಖ್ವ್ ಪೀನ್ ಕಯೇಪ್ ನಕೊ ಲ್ಲಡೈಲೆವೊ. ಇನೇಧಿ

ಪಾಪ್ ಕರಾನ ಝಗೊ ಮಳಾಸ್, ಕತೋಬಿ ಪವಿತ್ರಾತ್ಮಧಿ ಭರೈನ್,

19 ಗೀದ್‌ಥೀಬಿ, ಸ್ತುತಿ ವಚನ್‌ಥಿಬಿ, ಆತ್ಮಿಕ್ ಲೂರ್ಡ್‌ನು ಗೀದ್‌ಥಿಬಿ
ಏಕ್‌ಥಿಏಕ್ ವಾತೆ ಬೋಲ್ತಹುಯಿನ್ ತುಮಾರ ದಿಲ್ಮ ಪ್ರಭುನ ಸ್ತುತಿನ್
ಗೀದ್ ಬೋಲೊ.

20 ಕೆದೇಬಿ ಖ್ಹಾರ ಕಾಮ್‌ಖ್ಹಾಜೆ ಅಪ್ಲೊ ಪ್ರಭು ಯೇಸು ಕ್ರಿಸ್ತನ ನಾಮ್
ಬಾ ಹುಯಿರ್ದೋತೆ ದೇವ್ ಧನ್ಯವಾದ್ ಕರೊ.

ಬಾವಣ್ ಅಜ್ಞು ಬಾವ್ರಿಯೆ

21 ಕ್ರಿಸ್ತನ ಡರ್‌ಭಕ್ತಿವಾಳ ಹುಯಿರ್ದೆನ್, ಏಕ್‌ಥಿಏಕ್ ಸಮರ್ಪಣ್‌ಥಿ
ಚಾಲಿಲೆವೊ.

22 ತಯೆಡಾವೊ, ತುಮೆ ಪ್ರಭುಮ ಕಿಮ್ಲಿ ಇಮ್ಮಸ್ ತುಮಾರ
ಬಾವ್ರಿಯೇನಿ ದಾಬುಕ್ಮ ರ್ಡ್ಲೆವೊ.

23 ಶನಕತೊ ಕ್ರಿಸ್ತ ಸಬೆನ ಮುಡ್‌ಕ್ಯ ಹುಯಿರ್ದೊಸ್ತೆ ಇಮ್ಮಸ್ ಬಾವ್ರಿ
ಬಾವಣ್ಣ ಮುಡ್‌ಕ್ಯ ಹುಯಿರ್ದೊಸ್. ಕ್ರಿಸ್ತಸ್ ಯೊ ಸಬೆಕರಿ ಶರೀರ್‌ನ
ರಕ್ಷಕ್ ಹುಯಿರ್ದೊಸ್.

24 ಸಬೆ ಕ್ರಿಸ್ತನಿ ದಾಬುಕ್ಮ ಕಿಮ್ ರ್ಡ್ಲೆಸ್ತಿ ಇಮ್ಮಸ್ ತಯೆಡಖ್ಹಾರು ಇವ್ಣ
ಬಾವ್ರಿಯೇನ ಖ್ಹಾರಿಸ್ ವಿಚಾರ್‌ಮ ದಾಬುಕ್ಮ ರ್ಡ್ಲೆವ್ಣ.

25 ಬಾವ್ರಿಯೆ, ಕ್ರಿಸ್ತ ಸಬೆನ ಪ್ಯಾರ್ ಕರಿನ್ ಜಾನ್ ದಿದೋತೆ ಇಮ್ಮಸ್
ತುಮಾರಿ ಬಾವ್ಣೆನ ಪ್ಯಾರ್‌ಕರೊ.

26 ದೇವ್ಣೆ ಇನ ಶುದ್ಧ ಕರಾನಖ್ಹಾಜೆ ಇನುಯೋಸ್ ಸಮರ್ಪಣ್
ಕರೈಲಿದೊ.

27 ಇನಖ್ಹಾಜೆ ಕಳಂಕ್‌ನಿ ದಾಗ್ ನಾ ರ್ಡ್ಲೆವ್ಣತೆ ಪರಿಶುದ್ಧಬಿ,
ದೋಷ್‌ಕೊಂತೆಬಿ, ಮಹಿಮೆಧಿ ರ್ಡ್ಲವಾನಿ ಸಬೆಕರೀನ್ ಇನಖ್ಹಾಪ್ಲೆ
ಭೀರಖಡ್ಕರಿ ಭೋದನೆನ ಜೋಡೆಸ್ ಪಾಣಿಧಿ ನೊಹಾಡಿನ್
ಶುದ್ಧಕರ್ದೊ.

28 ಇಮ್ಮಸ್ ಬಾವ್ರಿಯೇಬಿ ಇವ್ಣ ಶೊಂತ್ ಶರೀರ್‌ನ ಪ್ಯಾರ್ ಕರಾಸ್ತೆ
ಇಮ್ಮಸ್ ಇವ್ಣ ಬಾವ್ಣೆನ ಪ್ಯಾರ್ ಕರಾವಾಳ ಹುಯಿರೇವ್ಣ, ಇನಿ ಬಾವಣ್ಣ
ಪ್ಯಾರ್ ಕರಾವಾಳೊ ಇನಾಸ್ ಪ್ಯಾರ್ ಕರಾವಾಳೊ ಹುಯಿರ್ದೊಸ್.

29 ಕೋಣೆಬಿ ಕದೇಬಿ ಶೋಂತ್ ಶರೀರ್‌ನ ವಹೇರ್ ಕೊಕರಾನಿ, ಇನ ಬದಲ್ ಅಖ್ವೊಜ್ಜಣು ಇವ್ವ ಶರೀರ್‌ನ ಖದ್ದರ್‌ಧಿ ಪಾಳಸ್. ಕ್ರಿಸ್ತ ಇಮ್ಮಸ್ ಪಾಳಿನ್ ಖದ್ದರ್ ಕರ್ತೊ ಆಯೊ. ಇಮ್ಮಸ್ ಸಬೇನಾಬಿ ಕರ್ಲ್ಯ.

30 ಇನಖ್ವಾಜೆ ಸಬೆಕರಿ ಶರೀರ್‌ನ ಅಪ್ಪೆ ಖದ್ದೊಅಖ್ವು ಹುಯಿರ್ಲ್ಯಾಸ್.

31 ಪವಿತ್ರ ದಪ್ಪರಮ ಅಮ್ ಲಿಖೈರ್ಲ್ಯಾಸ್ ಅನಖ್ವಾಜೆಸ್ ಪಖ್ವೊ ಆಯ-ಬಾನ ಮ್ಹೇಲಿನ್ ಇನಿ ಬಾವಣ್‌ಧಿ ಮಳಾಸ್, ಇವ್ವೆ ಎಕ್ಕ್‌ಸ್ ಶರೀರ್ ಹುಯಿರಾಸ್‌ಕರಿ ಬೋಲಸ್. ಅಜ್ಜು ಇವ್ವೆ ಬೇಜ್ಜಣ ಎಕ್ಕ್‌ಸ್ ಹುಯಿರಾಸ್.

32 ಮೆ ಕ್ರಿಸ್ತನಾಬಿ ಸಬೇನಾಬಿ ಛಾತೆ ಸಂಬಂದನಿ ಬಾರೇಮ ಬೋಲುಕರುಸ್, ಹಮ್ಮೆತೋಡಿ ಗಧಾರ್‌ಧಿ ಲಪಿರ್ಲ್ಯಾತೆ ಖ್ವಾಚ್ಚು ಹುಯಿರ್ಲ್ಯಾಸ್.

33 ಯೊ ತುಮುನಾಬಿ ಹುವಾಸ್, ತುಮಾರಮ ಹರೇಕ್ ಬಾವಿ ಇನುಯೋ ಪ್ಯಾರ್ ಕರಾನಿತರಸ್ ಇವ್ವಿ ಬಾವ್ಣೆನ ಪ್ಯಾರ್ ಕರ್ಲ್ಯ. ಅಖ್ವಿ ಬಾವಣ್ ಇವ್ವ ಬಾವಿಯೇನ ಇಜ್ಜಧಿ ಚಾಲಿಲೇವ್ವ.

6

ಆಯ ಬಾ ಅಜ್ಜು ಲಡ್ಕಾ

1 ಲಡ್ಕಾವೊ, ತುಮೆ ಪ್ರಭುಮ ರ್ವಾವವಾಳನಿತರಸ್ ತುಮಾರ ಆಯಬಾನ ಹೇಟು ಹುಯಿರ್ಲ್ಯಾವೊ. ಆ ನ್ಯಾವ್‌ನು ಹುಯಿರ್ಲ್ಯಾಸ್.

2 ವಾಗ್ಡಾನ್‌ಮ ಛಾತೆ ಪಹಿಲಿ ಹುಕುಮ್‌ನ ಖದ್ದಮ್‌ಜೊ, “ತುಮಾರ ಆಯ ಬಾನ ಮರ್ಯಾದಿ ದೇವ್ವು”.

3 “ಅನ ಚಲಾಯತೊ ತುಮುನ ಅಛ್ಚು ಉಷೆ, ಅಜ್ಜು ತುಮೆ ಜಮೀನ್‌ಪರ್ ಘಣ ವರಖ್ವೊಜಿವ್‌ಶು”.

4 ಆಯ ಬಾವೊ, ತುಮಾರ ಲಡ್ಕಾನ ಛೇಡಾವ್ಣುನಾತೆ, ಪ್ರಭುನ ಲ್ಹಾಯಕ್ ಹುವಾನಿ ಪರಕ್ಕ್ ಇವ್ವುನ ದಾಬುಕ್ಕ್ ಚಾಲನು ಶಿಕಾಡಿನ್ ಪಾಳಿ ಪರ್ವೆಶಿಕರೊ.

ಯಜಮಾನ್‌ಖ್ವಾರು ಅಜ್ಜು ಗುಲಾಮ್‌ಖ್ವಾರು

5 ಆಳ್‌ಖ್ವಾರ, ಆ ಜಗತ್ತ ಯಜಮಾನ್ ಹುಯಿರ್ವವಾಳನ ಕ್ರಿಸ್ತನಿ ದಾಬುಕ್ಕುಕಿಮ್ ರ್ವೀಸ್ತಿ ಇಮ್ಮಸ್ ದಿಲ್ಮಡರ್‌ಧಿ ಕಾಪವಾಳಹುಯಿರ್ವ್ವೀನ್ ಛುಟ ದಿಲ್‌ವಾಳಹುಯಿನ್ ದಾಬುಕ್ಕುರ್ವ್ವೊ.

6 ಅದ್ವಿಖ್ವಾರು ಪಸಂದ್ ಕರಾನಿತರ ಛಾವಣಿನಖ್ವಾಜೆ ಯಜಮಾನ್ ದೇಮುಕರಾನಿ ವಖ್ವಾತೆ ಖಲಿ ಕಾಮ್ ನಾಕರ್ವ್ವತೆ, ಕ್ರಿಸ್ತನಿ ಆಳ್‌ನಿಘೋಣಿ ದೇವ್ವಿ ಮರ್ಜಿನ ಪೂರ ಮನ್‌ಧಿ ಚಾಲಿಲೆವೊ.

7 ತುಮೆ ಕರಾನು ಸೇವೆ ಅದ್ವಿನಾಸ್ ಕಾಹೆತೆ, ಪ್ರಭುನ ಖ್ವಾಜೆಧಿ ಕಾಮ್ ಕರುಕರೆಸ್ ಕರಿ ಪೂರ ಮನ್‌ಧಿ ಸೇವೆಕರೊ.

8 ಶನಕತೊ ಏಕ್‌ಜಣೊ ಆಳ್ ಹುಯಿರ್ವ್ವೊ ಛುಟಾರ್‌ವಾಳು ಹುಯಿರ್ವ್ವೊ ಇವ್ವೆ ಶಾತ್ ಅಲ್ಫುಕಾಮ್ ಕರಾಸ್ತಿ ಇನು ಇನಾಮ್ ಪ್ರಭುಧಿ ಲೀಲಿಶ್ ಕರಿ ತುಮುನ ಮಾಲುಮ್ ಛಾ.

9 ಯಜಮಾನವೊ, ತುಮಾರ ಆಳ್ವಿ ಬಾರೇಮ ಇಮ್ಮಿ ಪರಕ್ಕುಸ್ ಚಾಲಿಲೆವೊ. ತುಮಾರ ಆಳ್‌ನ ಡರಾವನು ಭೀರಾಕಿ ದೆವೊ. ಪರಲೋಕ್‌ಮ ತುಮುನಬಿ ಇವ್ವುನಾಬಿ ಯಜಮಾನ್ ಹುಯಿರ್ವ್ವೊಸ್ತೆ ದೇವ್‌ಬಿ ಇನಾಮ ಬೇದ್‌ಭಾವ್ ಕೊಯ್ವಿಕರಿಬಿ ಮಾಲುಮ್ ಕರಿಲೆವೊ.

ದೇವ್ವು ಬಚ್ಚಾಡನು ಕವಚ್

10 ಖ್ವರ್ತಿಮ, ತುಮೆ ಪ್ರಭುಮಾಬಿ ಇನಿ ಘಣಿ ಮೋಟಿ ಶಕತ್‌ಮಾಬಿ ತಾಖತ್‌ವಾಳ ಹುವೊ.

11 ಶೈತಾನ್ನಿ ಲಝುಣ್‌ನ ತುಮೆ ವಿರೋದ್‌ಕರಿನ್ ಭಿರಾವನಖ್ವಾಜೆ ದೇವ್ ದೇಸ್ತೆ ಖ್ವಾರ ಕಪ್ಪನ್ನ ಫೆರಿಲೆವೊ.

12 ಶನಕತೊ ಅಪ್ಪೆ ಲಡಾನು ಖಲಿ ಅದ್ವಿನ ಜೋಡೆ ಕಾಹೆ. ಕತೋಬಿ ಅಪ್ಪಿ ಖ್ವಾಜ್ ರಾಜ್‌ನ ಉಪ್ಪರ್‌ಬಿ, ಅದಿಕಾರಿನ ಉಪ್ಪರ್‌ಬಿ, ಆ ಅಂಧಾರನಿ ಜಗತ್ತಿ ಅದಿಪತಿನ ಉಪ್ಪರ್‌ಬಿ, ಆಸ್ತಾನ್ನ ಗೋಳಾಮ ಛಾತೆ ನಾಶ್ ಕರಾನಿ ಆತ್ಮಾನಿ ದಂಡ್ ಉಪ್ಪರ್‌ಬಿ, ಅಪ್ಪೆ ಲಡವಾಳ ಹುಯಿರ್ವ್ವಾಸ್.

13 ಇನಾಖ್ವಾಜೆ ಯೊ ಖರಾಬ್ ದನ್ಮ ವಹೇರೈಖ್ವಾರಾನ ಭಿಡಾನಖ್ವಾಜೇಬಿ ಕರ್ನುತೆ ಖ್ವಾರಕಾಮ್ ಕರೀನ್ ಘಟ್‌ಥಿ ಭಿರೈವನ ಖ್ವಾಜೆ ಅಜು ಇನಪಾರ್ ಶಕತ್‌ವಾಳ ಹುವಾನಿತರ ದೇವ್ ದೇಸ್ತೆ ಅಖ್ವಿ ಕಪ್ಪನ್ನ ಧರಿಲೆವೊ.

14 ಇನಖ್ವಾಜೆ ಖ್ವಾಚಿನಸ್ ಕಂಬರ್‌ನು ಕಷ್‌ಬಂದ್ ಕರಿ ಭಾಂದಿಲೀನ್, ನೀತಿನಸ್ ಛಾತಿನ ಕವಚ್ ಕರಿ ಫೆರೀನ್,

15 ಸಮಾಧಾನ್ನಿ ಸುವಾರ್ತೆನ ಬೋಲಿ ವತಾಳನಖ್ವಾಜೆ ತಯಾರ್‌ನ್ನಿ ದಿಲ್‌ಕರಿ ಬೋಲಾನು ಚಪ್ಪೇನ ಫಾಲಿನ್ ಭೀರೆವೊ.

16 ಅಖ್ವೇಥಿ ಜಾಖ್ವತ್ ವಿಶ್ವಾಸ್ ಕರಿ ಥಾಲ್ನ ಧರಿಲೆವೊ. ಇನೇಥಿ ತುಮೆ ವಹೇರೈನಿ ಆಗ್‌ನಿ ತೀರ್ನ್ ಆಡುಕರಾನ ಶಕತ್‌ವಾಳ ಹುಯಿರೈಶು.

17 ಆಬಿ ಕಾಹೆತೆ ರಕ್ಷಣೆಕರಿ ಮುಡ್‌ಕ್ಯಾನು ಕವಚ್‌ನ ಫಾಲಿಲೀನ್ ಪವಿತ್ರಾತ್ಮದೇಸ್ತೆ ದೇವ್ನಿ ವಚನ್ ಕರಿಬೋಲಾನು ತಲ್ವಾರ್‌ನ ಧರಿಲೆವೊ.

18 ತುಮೆ ಪವಿತ್ರಾತ್ಮಧಿ ಭರೈನ್ ಖ್ವಾರಿ ವಖ್ವತ್‌ಮ ಹರೇಕ್ ತರಿಕಾನಿ ಪ್ರಾರ್ಥನೆಥಿಬಿ ಬಿಂತಿನಿವ್ವಾರ್ಥಿಬಿ ದೇವ್ನ ಪ್ರಾರ್ಥನೆ ಕರೊ. ಅನಾಮ ಏಕ್ ಖ್ವಿಯಾಲ್‌ವಾಳು ಹುಯಿನ್ ದೇವ್ನ ಅದ್ಮಿ ಖ್ವಾರಾನಿ ಬಾರೇಮ ಬಿಂತಿಕರ್ತುಹುಯಿನ್ ಜತನ್‌ಥಿ ರ್ವೊ. ಅಖ್ವಾಸ್ ಅದ್ಮಿನಖ್ವಾಜೆ ಹಮೇಶ ಪ್ರಾರ್ಥನೆ ಕರಾನು ನಕೊ ಮ್ಹೇಲೊ.

19 ಮಾರಖ್ವಾಜೆಬಿ ಪ್ರಾರ್ಥನೆ ಕರೊ ಮೆ ವಾತೆ ಬೋಲಾನ ಮ್ಹೋಡು ಫೋಡಾನಿ ವಖ್ವತೆ ಅಗ್‌ಲ್ಯ ಹಗಾಮ್ನ ಲಪಿಥಿತೆ ಸುವಾರ್ತೆನಿ ಖ್ವಾಚಿನ ಡರ್‌ಕೊಂತೆ ಬೋಲಾನಖ್ವಾಜೆ ಹೋಣುತೆ ವಾತೆನ ದೇವ್ ಮನ ದೈವಾದೆ.

20 ಯೊ ಅಲ್ಫಿಸಂದೇಶ್‌ಲೀಜಾವಳೊ ಹುಯಿರೈಶ್ವರತೆ ಮೆ ಜೇಲ್‌ಮ ಖ್ವಿಂಕಳಾಥಿ ಬಂಧಿಹುಯಿನ್ ಪಡ್ಕೊಸ್. ಇನಿ ಬಾರೇಮ ಮೆ ಬೋಲ್ವತೆ ಇಮ್ಮಸ್ ಭಾಲಿಥಿ ಮೆ ಬೋಲಾನಿತರ ಮಾರ ಖ್ವಾಜೆ ಬಿಂತಿಕರೊ.

ಖ್ವರ್ತಿನಿ ಖ್ವಲಾಮ್

21 ಮಾರಿ ಬಾರೇಮ ಮಾರು ಕಾಮ್ ಖ್ವಾರು ತುಮುನ ಮಾಲುಮ್ ಹೋಣುಕರಿ ಪ್ಯಾರ್‌ನೊ ಭೈಬಿ ಪ್ರಭುಮ ವಿಶ್ವಾಸ್‌ವಾಳೊ ಸೇವೆಮ ಛಾತೆ ತುಖಿಕ ತುಮುನ ಅಖ್ಖು ಬೋಲಿದಿಶೆ.

22 ತುಮೆ ಹಮಾರಿ ಬಾರೇಮ ಮಾಲುಮ್‌ಕರಿಲೇವ್ಣು ಕರಿಬಿ, ಯೊ ತುಮಾರ ದಿಲ್ವಿಖ್ವಾರು ಭಾಲಿ ದೇವ್ಣುಕರೀಬಿ ಇನ ತುಮಾರಕನ ಮೋಕ್ಲಿರಾಖ್ಯೊಸ್.

23 ಬಾ ದೇವ್‌ಥಿಬಿ ಪ್ರಭು ಯೇಸು ಕ್ರಿಸ್ತುಥಿಬಿ ಶಾಂತಿಬಿ, ವಿಶ್ವಾಸ್‌ಥಿ ರ್ವಾವಾನಿ ಪ್ಯಾರ್ ಅಖ್ಖಾಸ್ ವಿಶ್ವಾಸಿ ಭೈಯೇ ಭೇನೆನ ಮಾಲುಮ್ ಹುವಾದೆ.

24 ಅಪ್ಪೊ ಪ್ರಭು ಯೇಸು ಕ್ರಿಸ್ತನ ಹಮೇಶಾಬಿ ಪ್ಯಾರ್ ಕರಾವಾಳ ಅಖ್ಖಾಸ್‌ಪರ್ ದೇವ್ಣಿ ವಾರ್‌ಖ್ವೊರ್ವಾದೆ.

ದೇವ್ವಿ ಖಾಜಿ ವಚನ್
The New Testament in the Vaagri Booli language of
India: ದೇವ್ವಿ ಖಾಜಿ ವಚನ್ (Bible)

copyright © 2023 The Word for the World International

Language: (Vaagri Booli)

Contributor: The Word for the World International

ದೇವ್ವಿ ಖಾಜಿ ವಚನ್
ವಿ ಒಪ್ಪಂದಾನ, 2023

The New Testament in Waghri Vathe Language

The Word for the World International

This translation is made available to you under the terms of the Creative Commons Attribution Share-Alike license 4.0.

You have permission to share and redistribute this Bible translation in any format and to make reasonable revisions and adaptations of this translation, provided that:

You include the above copyright and source information.

If you make any changes to the text, you must indicate that you did so in a way that makes it clear that the original licensor is not necessarily endorsing your changes.

If you redistribute this text, you must distribute your contributions under the same license as the original.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

Note that in addition to the rules above, revising and adapting God's Word involves a great responsibility to be true to God's Word. See Revelation 22:18-19.

2025-07-09

PDF generated using Haiola and XeLaTeX on 9 Jul 2025 from source files dated 9 Jul 2025

c0e4b622-a4d7-5e71-865e-40f2bf35bd06